

RIALACHÁN CUR CHUN FEIDHME (AE) 2021/2090 ÓN gCOIMISIÚN**an 25 Samhain 2021****maidir le húdarú dé-ocsaíde tíotániam a dhiúltú mar bhreiseán beathaithe le haghaidh gach speicis ainmhíoch****(Téacs atá ábhartha maidir le LEE)**

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (CE) Uimh. 1831/2003 ó Pharlaimint na hEorpa agus ón gComhairle an 22 Meán Fómhair 2003 maidir le breiseáin lena n-úsáid i gcothú ainmhithe ⁽¹⁾, agus go háirithe Airteagal 9(2) de,

De bharr an mhéid seo a leanas:

- (1) Le Rialachán (CE) Uimh. 1831/2003 foráiltear maidir le húdarú breiseán lena n-úsáid i gcothú ainmhithe agus maidir leis na forais agus na nósanna imeachta atá ann chun an t-údarú sin a dheonú nó a dhiúltú. Le hAirteagal 10 den Rialachán sin foráiltear maidir le hathmheastóireacht a dhéanamh ar bhreiseáin a údaraíodh de bhun Threoir 70/524/CEE ón gComhairle ⁽²⁾.
- (2) Le Treoir 70/524/CEE údaraíodh dé-ocsaíd tíotániam, gan teorainn ama, mar bhreiseán dathúcháin (oibreáin dathúcháin atá údaraithe chun earraí bia a dhathú de réir rialacha an Chomhphobail) le haghaidh cat agus madraí. Údaraíodh é freisin, gan teorainn ama, i mbeatha ainmhithe le haghaidh gach speicis ainmhíoch, seachas cait agus madraí, faoi choinníollacha áirithe. Ina dhiaidh sin cuireadh an táirge sin i gClár na mbreiseán beathaithe mar tháirge a bhí ann cheana, i gcomhréir le hAirteagal 10(1) de Rialachán (CE) Uimh. 1831/2003.
- (3) I gcomhréir le hAirteagal 10(2) de Rialachán (CE) Uimh. 1831/2003 i gcomhar le hAirteagal 7 de, cuireadh isteach iarratas chun athmheastóireacht a dhéanamh ar dhé-ocsaíd tíotániam mar bhreiseán beathaithe le haghaidh gach speicis ainmhíoch. D'iarr an t-iarratasóir go n-aicmeofaí an breiseán sin i gcatagóir na mbreiseán "breiseáin chéadfacha" agus san fheidhmghrúpa "dathúcháin: substaintí a chuireann dath ar ábhair bheatha nó a chuireann dath ar ábhair bheatha an athuair". Bhí na sonraí agus na doiciméid a cheanglaítear faoi Airteagal 7(3) de Rialachán (CE) Uimh. 1831/2003 ag gabháil leis an iarratas.
- (4) Thug an tÚdarás Eorpach um Shábháilteacht Bia ("an tÚdarás") dá aire, ina thuairim ón 5 Bealtaine 2021 ⁽³⁾, nach bhféadfadh sé teacht ar chonclúid maidir le sábháilteacht dé-ocsaíde tíotániam don spriocspeiceas, do thomhaltóirí agus don chomhshaol, mar tá easpa sonraí sonracha ann a bhaineann lena húsáid mar bhreiseán beathaithe agus ós rud é nach féidir géineatocsaineacht na gcáithníní dé-ocsaíde tíotániam a chur as an áireamh, tá ábhair inní ann maidir le sábháilteacht an bhreiseáin don spriocspeiceas (go háirithe i gcás ainmhithe fadsaolacha agus ainmhithe atáirgeacha), do thomhaltóirí agus d'úsáideoirí. Cheal staidéar maidir le dé-ocsaíd tíotániam, níorbh fhéidir leis an Údarás teacht ar chonclúid i dtaca leis an measúnú ar éifeachtaí an bhreiseáin ar na súile agus ar an gcráiceann. Thug an tÚdarás dá aire freisin go bhféadfadh dé-ocsaíd tíotániam a bheith carcanaigineach i leith oibrithe má ionanálaíonn siad é agus, ós rud é nach féidir géineatocsaineacht na gcáithníní dé-ocsaíde tíotániam a chur as an áireamh, ba cheart a mheas gur cúis inní fhéideartha bhreise é d'úsáideoirí a láimhseálann an breiseán. Rinne an tÚdarás fíorú freisin ar an tuarascáil faoi mhodh anailíse an bhreiseáin beathaithe agus é i mbeatha arna cur isteach ag an tSaotharlann Tagartha a bunaíodh le Rialachán (CE) Uimh. 1831/2003.
- (5) Léirítear le tuairim an Údarais an 5 Bealtaine 2021, mar sin, nár suíodh nach bhfuil éifeacht dhíobhálach ag dé-ocsaíd tíotániam ar shláinte ainmhithe, ar shláinte an duine ná ar an gcomhshaol nuair a úsáidtear í mar bhreiseán beatha san fheidhmghrúpa "dathúcháin: substaintí a chuireann dath ar ábhair bheatha nó a chuireann dath ar ábhair bheatha an athuair".

⁽¹⁾ IO L 268, 18.10.2003, lch. 29.⁽²⁾ Treoir 70/524/CEE ón gComhairle an 23 Samhain 1970 maidir le breiseáin in ábhair bheatha (IO L 270, 14.12.1970, lch. 1).⁽³⁾ Iris EPSA 2021;19(6):6630.

- (6) Mar sin léirítear leis an measúnú ar dhé-ocsaíd tíotáiniam nach gcomhlíontar na coinníollacha údaraithe, dá bhforáiltear in Airteagal 5 de Rialachán (CE) Uimh. 1831/2003, agus dá réir sin ba cheart údarú dé-ocsaíde tíotáiniam mar bhreiseán beathaithe a bhaineann leis an bhfeidhmghrúpa “dathúcháin: substaintí a chuireann dath ar ábhair bheatha nó a chuireann dath ar ábhair bheatha an athuair” a dhiúltú.
- (7) Mar sin de, ba cheart an breiseán beathaithe dé-ocsaíd tíotáiniam agus beatha ina bhfuil sí a tharraingt siar ón margadh a luaithé is féidir. Ba cheart tréimhse ama teoranta a cheadú, áfach, le haghaidh stoic reatha na dtáirgí sin a tharraingt siar ón margadh chun gur féidir le hoibreoirí an oibleagáid maidir le tarraingt siar a chomhlíonadh mar is ceart.
- (8) Tá na bearta dá bhforáiltear sa Rialachán seo i gcomhréir leis an tuairim ón mBuainchoiste um Plandaí, Ainmhithe, Bia agus Beatha,

TAR ÉIS AN RIALACHÁN SEO A GHLACADH:

Airteagal 1

Údarú a dhiúltú

Déantar údarú dé-ocsaíde tíotáiniam (E 171) mar bhreiseán i gcothú ainmhithe, i gcatagóir na mbreiseán “breiseáin chéadfacha” agus san fheidhmghrúpa “dathúcháin: substaintí a chuireann dath ar ábhair bheatha nó a chuireann dath ar ábhair bheatha an athuair” a dhiúltú.

Airteagal 2

Tarraingt siar ón margadh

1. Tarraingeofar siar ón margadh stoic reatha an bhreiseáin dá dtagraítear in Airteagal 1 agus stoic na réamh-mheascán ina bhfuil sé faoin 20 Márta 2022.
2. I dtaca le hábhair bheatha agus beatha cumaisc a táirgeadh leis an mbreiseán nó leis na réamh-mheascáin dá dtagraítear i mír 1 roimh 20 Márta 2022, tarraingeofar siar ón margadh iad faoin 20 Meitheamh 2022.

Airteagal 3

Teacht i bhfeidhm

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, 25 Samhain 2021.

Thar ceann an Choimisiúin

An tUachtarán

Ursula VON DER LEYEN